

## Izveštaj sa 29. sjednice Općinskog vijeća

26.03.2015. godine održana je 29. sjednica Općinskog vijeća, na kojoj je razmatrano 11 tačaka Dnevnog reda.

Nakon usvajanja Zapisnika sa prethodne sjednice i Dnevnog reda, na trećoj tački našao se Prijedlog Odluke o finansiranju parlamentarnih grupa u Općinskom vijeću Ilijaš.

Ovom Odlukom uređuje se način finansiranja parlamentarnih grupa koje imaju svoje vijećnike u Općinskom vijeću Ilijaš i samostalnih vijećnika. U smislu ove Odluke parlamentarnu grupu formiraju političke stranke, koalicije i liste nezavisnih kandidata koje su ostvarile mandate u Općinskom vijeću.

Sredstva za finansiranje parlamentarnih grupa osiguravaju se Budžetom Općine Ilijaš za svaku fiskalnu godinu.

Vijećnici su podržali Plan rada JU "KULTURNO-SPORTSKI CENTAR I RADIO ILIJAŠ" ILIJAŠ za 2015. godinu, kao i Izveštaj o radu i finansijskom poslovanju za 2014. godinu. "JU"KSC I RADIO ILIJAŠ", kao multidisciplinarna ustanova ima za cilj kreiranje i promociju kulturno-sportskih i obrazovnih aktivnosti na području Općine Ilijaš. Jedna od veoma bitnih misija Ustanove, jeste svakodnevno informisanje stanovništva putem frekvencija Radio Ilijaša i web stranice. JU je u toku 2014. godine bila nosilac i organizator mnogobrojnih koncerata, raznih muzičkih žanrova, pozorišnih predstava, likovnih izložbi, promocija knjiga, projekcijeje filmova u 3D tehnici, te omogućila svim sportskim klubovima i udruženjima da kvalitetno obavljaju svoje aktivnosti u promociji sporta. Bez obzira na određene finansijske izazove i poteškoće u kojima se Ustanova nalazi Ustanova je uspjela na efikasan način realizovati sve planirane zadatke i aktivnosti tokom 2014. godine", navodi se između ostalog u Izveštaju. Tokom 2015. godine Ustanova će nastaviti kontinuirano raditi na poboljšanju pružanja usluga korisnicima.

Na šestoj tački našao se Izveštaj o izvršenju Budžeta Općine Ilijaš za period 01.01.-31.12.2014. godine. Izveštaj sadrži prikaz planiranih i ostvarenih prihoda za navedeni period, prikaz planiranih i ostvarenih izdataka za navedeni period, grafički prikaz strukture prihoda i primitaka, grafički prikaz rashoda, objašnjenje pojedinih stavki iz Budžeta, podatke o svim poslovima zaduženja i upravljanja dugom, podatke o korištenju budžetske rezerve te o garancijama tokom fiskalne godine. Budžet Općine Ilijaš za period 01.01.-31.12.2014. godine bilježi 10.115.135,00 KM što je 107% od planiranih prihoda Budžeta za 2014. godinu. Izdaci ostvareni za 2014. godinu su u iznosu od 8.207.042,00 KM što predstavlja 87% od planiranih izdataka, a nakon kraće rasprave vijećnika usvojen je i Prijedlog Odluke o utvrđivanju novog građevinskog zemljišta i plana parcelacije za izgradnju apartmanskog naselja Ivančići i Ljubinići.

Vijećnici su podržali i Prijedlog Rješenja iz imovinsko-pravne oblasti kojim se utvrđuje da je od javnog interesa rekonstrukcija i proširenje dijela postojećeg Regionalnog puta R 445 Ilijaš – Visoko na potezu od naplatnih kućica – mjesta postojećeg ostrva za skretanje prema Ilijašu do prelaza preko pruge za dvosmjerni saobraćaj sa 4 trake, na lokalitetu Podlugova u dužini od cca 340 m i izgradnje pješačkih staza sa obje strane puta, te da se u tu svrhu može pristupiti potpunoj eksproprijaciji zemljišta.

Informacija o provođenju Zakona o matičnim knjigama i Informacija o dodjeli općinskih stipendija za učenike i studente u školskoj 2014/2015. godini primljene su k znanju.